


**AWIG-AWIG  
DESA PAKRAMAN CEBOK**



**DESA KEDISAN  
KECAMATAN TEGALLALANG  
KABUPATEN GIANYAR**

# P I D A G I N G

## MAKA BANTANG AWIG-AWIG DESA PAKRAMAN CEBOK

### MURDDHA - CITTA

|                  |                                         | WIDANG |
|------------------|-----------------------------------------|--------|
| PRATHAMA SARGAH  | ARAN LAN WAWIDANGAN DESA                | 1      |
| DWITYA SARGAH    | PATITIS LAN PAMIKUKUH                   | 2      |
| TRITYA SARGAH    | SUKERTA TATA PAKRAMAN                   | 2      |
|                  | Palet 1 Indik Krama .....               | 2      |
|                  | Palet 2 Indik Prajuru / Dalun Desa..... | 5      |
|                  | Palet 3 Indik Kulkul .....              | 6      |
|                  | Palet 4 Indik Paruman .....             | 7      |
|                  | Palet 5 Indik Druwen Desa .....         | 9      |
|                  | Palet 6 Sukerta Pamitegep .....         | 10     |
|                  | Kaping 1 Karang, tegal lan carik ...    | 10     |
|                  | Kaping 2 Pepayonan .....                | 10     |
|                  | Kaping 3 Wewangunan .....               | 11     |
|                  | Kaping 4 Wewalungan .....               | 11     |
|                  | Kaping 5 Bhaya .....                    | 12     |
|                  | Kaping 6 Panyanggran Banjar .....       | 13     |
| CATHURTAS SARGAH | SUKERTA TATA AGAMA                      |        |
|                  | Palet 1 Indik Dewa Yadnya .....         | 13     |
|                  | Palet 2 Indik Resi Yadnya .....         | 17     |
|                  | Palet 3 Indik Pitra Yadnya .....        | 17     |
|                  | Palet 4 Indik Manusa Yadnya .....       | 21     |
|                  | Palet 5 Indik Bhuwa Yadnya .....        | 21     |
| PANCAMA SARGAH   | SUKERTA TATA PAWONGAN                   |        |
|                  | Palet 1 Indik Pawiwahan .....           | 22     |
|                  | Palet 2 Indik Nyapian .....             | 24     |
|                  | Palet 3 Indik Sentana .....             | 25     |
|                  | Palet 4 Indik Warisan .....             | 27     |
| SAT SARGAH       | WICARA LAN PAMIDANDA                    |        |
|                  | Palet 1 Indik Wicara .....              | 29     |
|                  | Palet 2 Indik Pamidanda .....           | 29     |
| SAPTAMA SARGAH   | NGUWAH-NGUWUHIN AWIG - AWIG             | 30     |
| ASTAMA SARGAH    | S A M A P T A                           | 31     |

## MURDHA CITTA

AUM, OM

Om Swastyastu, Om Awighnamastu Nama Siddham,

Malarapan panghyangning Ida Sang Hyang Widhi Wasa, asung kerta nugraha ngawentenang kahuripan sakala niskala, ring Bhuwana Agung lan Bhuwana Alit. Manut dresta desane wantah pawakan pasayuban Krama Desa rawuhing kula warga pawongannya. Desane kamanggehang Bhuwana Agung, pawongannya sowang-sowang pinaka Bhuwana Alit.

Sotanin Bhuwana Agung desane wantah pawakan Bhawa maurip, jangkep saha Tri Hita Karananya, luwire :

- ha. Parhyangan, sahananing kahyangan, panyiwian desa genah ngarcana Ida Hyang Parama wisesa, maka jiwaan desane.
- na. Pawongan, krama saha warga desa maka sami pawakan Bayu Pramana (Tri Kaya) mawinan desane sida molah maprawerti.
- ca. Palemahan, tanah kakuwuban desa, sinanggeh stula sariraning desane.

Adung patemon bhuwana kalih, larapan santa jagadhita, sinanggeh murdhaning prayojana pangriptaning Awig-awig Desa Pakraman ring sabha krama Desa Pakraman Cebok.

Pamutus sabha inucap pinaka sepat siku-siku pamatut , wastu prasida prayojanan mami kabeh prasama anghidep muwah amagehaken kadi linging Awig-awig iki.

### PRATHAMA SARGAH

#### ARAN LAN WAWIDANGAN DESA

##### Pawos 1

- (1) Desa Pakraman Puniki mawasta Desa Pakraman Cebok.
- (2) Jebar kakuwub wawidangannya mawates nyatur :
  - ha. Sisih Wetan ring Desa Pakraman Delod Blumbang/Manuaba;
  - na. Sisih Kulon ring Desa Pakraman Kebon;
  - ca. Sisih Lor ring Desa Pakraman Kedisan;
  - ra. Sisih Kidul ring Desa Pakraman Tegallalang.
- (3) Desa puniki kawangun antuk 66 karang ayahan Desa lan 9 karang gunakaya kadadosang wantah tunggal banjar.

DWITYA SARGAH.....

DWITYA SARGAH

PATITIS LAN PAMIKUKUH

Pawos 2

Desa Pakraman Cebok ngamanggehang pamikukuh minakadi :  
ha. P a n c a s i l a ;  
na. Undang-undang Dasar 1945;  
ca. Paswaran Sangmawangrat nganinin indik Desa Pakraman;  
ra. Tri Hita Karana manut sada cara Agama Hindu.

Pawos 3

Luwir Patitis Desa Pakraman Cebok:

ha. ngukuhang miwah ngrajegang Sang Hyang Agama;  
na. nginggilang tata Prawertine maagama;  
ca. ngrajegang kasukertan Desa saha Pawongannya sakala lawan  
niskala.

TRITYA SARGAH

SUKERTA TATA PAKRAMAN

Palet 1

Indik Krama

Pawos 4

- (1) Sane kabawos Krama Desa inggih punika kulawarga sane maagama Hindu saha ngenahin karang desa utawi karang gunakaya saha jenek mapaumahan ring sawidangan desa.
- (2) Sajaba punika sinanggeh tamiyu, sane kabinayang dados kalih inggih punika sane maagama Hindu, miwah siwosan ring maagama Hindu.
- (3) Indik Tamiyu punika manut pararem.

Pawos 5

Krama Desa wenten 5 (limang) pawos, luwire :

ha. krama ngarep, kula warga sane ngamong karang desa utawi gunakaya, saha manut pararem;  
na. krama pangele/pangempian kulawarga sane nenten ngamong karang nanging sampun mawiwaha, kabawos krama banjar patas;  
ca. krama pangempian kulawarga sane rawuh madunungan ring sinalih tunggil krama desa utawi sangkaning mawirasa/ngrerereh pangupa jiwa. Prade jantos 3 (tigang) sasih patut taler makrama banjar;

ca. krama.....

ra. krama balu, krama sane katinggal seda olih lanang utawi istri nyane, utawi sangkaning nyapihan; Krama balu inucap kabinayang dados :

1. Balu makrambian, inggih punika balu sane maduwe sentana dereng marabian utawi dereng antes ngayah.
2. Balu ngaliating, inggih punika balu sane tanpa sentana punika dados kakuwub (kundul).

ka. krama tapukan, kulawarga manut aksara ha ring ajeng sakewanten durung antes ngayah utawi salami kanton masekolah malarapan ilikita pastika saking sekolahnya dados napuk ayah, manut pararem.

da. sang numbas/ngontrak karang ring Desa Pakraman Cebok patut makrama banjar, nanging yaning Jangkep Tri Mandala patut makrama Desa.

#### Pawos 6

Ngawit dados Krama Desa :

ha. Sangkaning ngamong karang, jenek mapaumahan tur Jangkep Tri Mandala;  
na. mawiwit pawiwahan.

#### Pawos 7

Panamaya tedun makrama Desa:

ha. jenek mapaumahan manut pararem;  
na. sang ma-Agama Hindu numbas karang tedun makrama Desa Pakraman;  
ca. Pawiwahan, sasasih sesampun upacara pasakapan polih panganteg.

#### Pawos 8

Sahanan Krama Desa keni tategenan luwire :

ha. ayah ngarep, mapiteges urunan miwah ayahan mamungkul dados magilir sajeroning akarang;  
na. ayah pangele/pangempian, manut pararem;  
ca. ayah balu, ayah miwah urunannya manut kahanan balu inucap;  
ra. ayah tapukan, keni urunan mamungkul.  
kaluputang ayah-ayahan, ngantos mayusa 17 warsa, utawi sampun mawiwaha. Yaning kanton masekolah, taler kaluputang ayah-ayahnya, malarapan ilikita pastika saking sekolahnya.  
ka. prade rikalaning ngayah wenten sinalih tunggil Krama matilar tanpa sadok sadereng puput karya, wenang Krama inucap keni pamidanda manut pararem, tanjek laler kawastanin;  
ka. sang numbas karang patch sakadi krama ngarep.

#### Pawos 9

Swadharma Krama, sewosan ring tategenan, luwire :

ha. Tinut saturut ring sadaging Awig-awig, pararem lan paswasaran Desa;  
na. Tan maren ngutsahayang mangda Desane mrasidhayang nyujur manut patitis;  
ca. Tinut saturut ring Guru Wisesa.

Pawos 10.....

Pawos 10

Swadharman Tamiyu, luwire :

- ha. Tinut saturut ring yasa kartin Desane;
- na. Tan piwal ring sadaging Awig-awig, pararem lan paswaran Desa;
- ca. Nyadokang raga ring Prajuru arahina sasampun jumenek malarapan antuk ilikita pastika saking desane utawi sang ngawwenang;
- ra. Yan tan tinut pacang kairid (tan kadadosang jumenek ring Desa).

Pawos 11

Piolihi-olihi Krama :

- ha. Polih pasayuban sakala niskala tur kabawosin saha katiwakin pamutus sahanan wicaranya;
- na. Nyarengin paruman tur wenang sareng mastikayang pamutus;
- ca. Kadadosang madeg Prajuru, manut pararem.

Pawos 12

Krama Desa Pakraman kadadosang :

- ha. mapoangkid utawi tan tedun :
  - 1) rikala mapawangun, ngeraabin, mayadnya, matepetin sungkan, matepetin rare, sungkan, kaluasan, lan siosan punika;
  - 2) kengin tempo wantah apisan, sajawanin wenten wak-wakan saking Prajuru Desa.
- na. nyada, mapiteges ngamademang ayah, risampun mayusa 75 warsa, utawi sungkan-sungkanan tan prasida nginutin krama, tur tan dados nyuksukin, sang nyada mangda digelis (sajeronin a warsa) mangda nyantenang panyeladihi;
- ca. nyade, utawi nyuksukin, sane kawenangang risampun manggeh deha-teruna utawi sampun mawiwaha tur mrasidayang nganutin krama;
- ra. nutug ayah antuk arta brana saantukan kapialang utawi ngentos ayah-ayah antuk arta brana majegin manut paetangan Prajuru, manawi kajudi olih sang mawangrat, utawi kaluasan salami 3 - 7 rahina.

Pawos 13

Wusan dados Krama Desa, luwire :

ha. Sangkaning :

- 1) Pinunas ngaraga, manawi kesah kadura Desa utawi ngalangkungin sagara;
- 2) Kanorayang , duaning sampun tan prasida ngesehin solah maprawerti satata nguwig pamargin Awig-awig.
- 3) Wusan makrama desa mapiteges taler wusan makrama banjar utawi wusan makrama banjar mapiteges wusan makrama desa, mangda sampunang kasinanggeh empak ngalanting.

na. Sang .....

na. Sang wusan makrama :

- 1) Patut ngaturang karang ayahan ka Desa, prade karang punika karang Desa;
- 2) Tan polih pah-pahan saking padruweyan Desa.
- 3) Tan polih pasayuban sajeronin ala ayu.
- 4) Sang wusan makrama desa/Banjar prade mawali malih patut nawur saurah arih tategenan krama marut pararem.

ca. Sang wusan sangkanin kanorayang, prade mawali malih patut:

- 1) muntasang saluwir pamidanda utawi tategenan sane ngranayang kanorayang;
- 2) munas geng pangampura ring paruman desa maduluran panyangaskara panyapsap kaiwangan duwaning nguwak pasubaya pecak.

#### Palet 2

Prajuru lan Dulun Desa (Panglingsir)

#### Pawos 14

- (1) Desa Pakraman Cebok kaenter olih Bendesa Pakraman.
- (2) Banjar kaenter olih Klian Banjar.

(3) Bendesa lan Klian Banjar patut :

ha. mawiwit saking krama ngarep/wed kajangkepin antuk:

- 1) Uning ring aksara latin utawi Bali;
- 2) Uning ring tata titining mawa desa;
- 3) Uning ring pariindik Agama lan Adat/sima;
- 4) Lascarya ngayah tur madruwe parilaksana sane rahayu.

na. Bendesa kaadegang malarapan antuk kacatri olih parumannya soang- soang: Bendesa Pakraman nyabran 10 (dasa) warsa lan klian banjar nyabran 5 (limang) warsa, sajawaning wenten pariindik tiyos, tur dados kacatri malih;

ca. maduluran Dewa saksi ring Pura Bale Agung.

#### Pawos 15

(1) Bendesa Pakraman kasanggra olih :

ha. Panyarikan pinaka juru surat;

na. Patengen utawi juru rakesa pinaka pangamong druwen Desa;

ca. Kasinoman pinaka juru arah;

ra. Klian Banjar pinaka pawantu.

(2) Klian Banjar kasanggra olih:

ha. Panyarikan banjar pinaka juru surat;

na. Patengen utawi juru rakesa pinaka pangemong druwean Banjar;

ca. Kasinoman pinaka juru arah.

(3) Kasinoman akehnya manut kawigunan saha magilir nyabran ngasasih.

(4) Sajeroning ngenterang kasukertan niskala, Bendesa mingsinggihang Pamangku Kahyangan Desa utawi sang Rumaga Sulinggih.

Pawos .....

Pawos 16

(1) Swadharmaning Bendesa Pakraman luwire :

- ha. ngenterang pamargin sadaging Awig-awig miwah pararem Desa;
- na. nuntun tur ngenterang krama rawuhing warga Desa sami ngupadi manut patitis;
- ca. mawosin kalih niwakang pamutus arep ring wicara warga Desa;
- ra. maka duta Desa matemuang bawos ring sapa sira ugi.

(2) Prade Prajuru iwang palaksana keni pamidanda nikel ring kaiwangan soang-soang krama, tur dados kararyanang manut pararem.

Pawos 17

Patias utawi olih-olihan Prajuru/Dulun Desa, luwire :

- ha. luput rerampen;
- na. polih tanding tengah;
- ca. upon pacatu/palaba carik (manut pararem);
- ra. patias sewosan manut pararem.

Pawos 18

(1) Prajuru / Dulun Desa kagentosin riantukan :

- ha. s e d a;
- na. kanorayang dwaning iwang pamargi utawi nilar sesana;
- ca. wit saking pakayun utawi pinunas ngaraga;
- da. sampun tutug panamaya.

(2) Nganorayang utawi ngentosin Prajuru/Dulu-dulu patut sajeroning paruman tur kaingkupin olih Krama Desa.

Palet 3

Indik Kulkul

Pawos 19

(1) Kulkul ring Desa luwire :

- ha. Kulkul ring Kahyangan;
- na. Kulkul Desa;
- ca. Kulkul Banjar;
- ra. Kulkul Sekaa-sekaa.

(2) Tabuh tatetakan kulkul ring Kahyangan Desa :

- ha. mungtit/silih asih, tengeran wenten Yadnya/Upacara;
- na. tulud lambat, tengeran tedun ngayah;
- ca. bulus, tengeran wenten bhaya.

(3) .....

(3) Tabuh tatepakan kulkul ring banjar :

ha. Bulus :

- 1) 1 tulus bulus, tengeran kageni bhaya;
- 2) 2 tulus bulus, tengeran kapandangan (artha bhaya);
- 3) 3 tulus bulus, tengeran jiwa bhaya;
- 4) tigang klentungan bulus panjang, tengeran lindu, er, lan pawana bhaya.

na. Lambat :

- 1) 4 tulus lambat , tengeran tedun ngayah utawi wenten pakaryan.
- 2) nungtit silih asih tengeran, surya grha, bulan kapangan;

ca. Klentungan :

- 1) 7 klentungan, tengeran rare embas;
- 2) 4 klentungan, tengeran pawiwahan;
- 3) 9 klentungan ngempang panjang, tengeran ngawangdeang karya;
- 4) 3 klentungan semeng, tengeran rare lampus (madelokan);
- 5) 5 klentungan sore, tengeran rare lampus (ka setra);
- 6) 5 klentungan semeng tengeran kalayusekaran anak sampun kepus untu ngantos lingsir lampus (madelokan);
- 7) 11 klentungan nyoreang tengeran kalayusekaran anak sampun kepus untu ngantos lingsir lampus (ka setra).

Pawos 20

- (1) Kulkul Desa utawi Banjar tan wenang katepak yening tan sangkaning pituduh Prajuru Desa / Banjar sajawaning tengeran bhaya.
- (2) Sang nepak tan sangkaning pituduh patut digelis atur supeksa maka buatan panepake, yan tan sapunika wenang sang mamurug kadanda manut pararem.
- (3) Kulkul sekaa-sekaa samaliha kulkul pondokan-pondokan tan kalugra nyawerin (matehin) sukat utawi tengeran kulkul Desa / Banjar sajawanin tengeran bhaya, prade mamurug taler kadanda manut pararem.

Palet 4

Indik Paruman

Pawos 21

- (1) Paruman/sangkepan ring Desa Pakraman Cebok, wenten :

ha. paruman Desa/Banjar, kawentenang :

- 1) nyabran ngasasih, maka cihna tanpa arah-arah, dwaning sampun tetep panamaya manut pararem banjar, nemonin rahina Budha Kliwon;
- 2) napkala ( padgata kala ) maka jalaran arah-arah manut tatujon.

na. sangkepan.....

- na. sangkepan Prajuru/dulun desa, kawentenang manut wiguna;
- ca. paruman sekaa-sekaa manut pabuat.

(2) Paruman Desa utawi Banjar madudonan sakadi ring sor :

ha. prasida lumaksana risampun katedunin olih sang patut ngamiletin, kamanggala antuk tengeran kulkul miwah mabusana Adat/sima madya, saha tan kalugra makta gegawan sakaluwire, tan maren ngarcana ring Ida Bhagawan Panyarikan maka sarana Widhi Widana cane;

na. maka sarana janggi, pangawit kalaksanayang panyacak sep-sepan saha riwusannya nyacak, ngetang dadosan gung alit manut pararem;

ca. tan kalugra ngawetuang suwara gora utawi byota, yang wenten asapunika keni pamidanda beya pacamil kadi dandaning nguman-uman ring sabha;

ra. pamutus babawos beruk sapanggul (ingkup) punika kamanggehang.

(3) Prade pidaging paruman tan kaingkupin mangda Prajuru/Dulun Desa ngilikang babawos, saha pamutusnya mangda kararemin olih Krama Desa, bilih tan prasida kasungkemin jantos ping tiga Prajuru/Dulu wenang nunas bawos ring Sang Ngawa Wenang.

Pawos 22

(1) Sajeroning paruman Desa, Bendesa patut nyobyahang pamargin ngenterang Desa, pamekas nganinin indik:

ha. munjuk lungsuring pakraman saha ayah-ayah, sulur arta brana, druwen Desa;

na. Rarincikan Prajuru / Dulu nganinin usaha Desa kapungkur.

(2) Pamutus paruman Desa sinanggeh pararem maka pamitegep daging Awig-awig.

Pawos 23

(1) Sangkepan Prajuru/Dulun Desa kawenangang wantah ngarincikang pangerencana usaha Desa kapungkur.

(2) Sangkepan Prajuru /Dulun Desa tan kawenang ngawedalang tategenan ring Krama sadereng kaingkupin olih Krama Desa ring paruman.

(3) Pamutus sangkepan prajuru/Dulun Desa ngawetuang pasuwara, maka pidaging pituduh sang Ngawawenang utawi ngonekang pecak pararem krama desa.

Palet.....

Palet 5

Indik Druwen Desa

Pawos 24

Padruwen Desa Pakraman Cebok sakadi ring sor :

ha. Kahyangan Desa luwire :

- 1) Kahyangan Tiga : Pura Desa lan Bale Agung, Pura Puseh, Pura Dalem lan Praja Pati.
- 2) Pura Catur Bhuwana;
- 3) Pura Taman;
- 4) Pura Ratu Gede Panyarikan;
- 5) Pura Danau Buwung;
- 6) Pura Gua (kreteg).

na. Wantilan Desa;

ca. Tanah tegalan (manut ilikita);

ra. Karang ayahan Desa, munjuk lungsur saking 66 karang ring ajeng;

ka. Setra-setra palebahan, makadi setra genit, setra pamendeman lan setra pamuhun;

da. Palaba Pura, carik (manut ilikita);

ta. Lelanguan, makadi tetabuhan lan ilen-ilen padruwen Desa/ babanjaran luwire :

- 1) Gong Banjar;
- 2) Klentangan Banjar;
- 3) Wayang lan gender Desa Pakraman;
- 4) Ilen-ilen wali Pura : Rejang, Pendet, Baris, Topeng;
- 5) Muwah padruwean tiyosan.

sa. Nyasa, sasanthi.

wa. Lembaga Perkreditan Desa (LPD).

Pawos 25

Piolihi-olihi Desa Pakraman Cebok, luwire :

ha. piolihi-olihi saking palaba Pura;

na. urunan Krama Desa Pakraman;

ca. paica saking Guru Wisesa;

ra. Paica-paica sane tiyosan, sane patut;

ka. usaha Desa Pakraman.

Pawos 26

(1) Prajuru / Dulun Desa wenang ngetangang pamupon laba Pura lan sapanunggalan druwen Desa.

(2) Pikolihi lan pamuponnya kaanggen prabeya piodalan saha wewangunan ring Pura miwah anggen kabuatan Desa Pakraman.

(3) Nyabran pasangkepan Desa, Prajuru /Dulu pangamong druwen desa nguningayang pariindik munjuk lungsur ring padruwean ring Krama Desa.

(4) Sakaluwiring druwen Desa patut wenten ilikitannya.

(5) Tan kalugra ngadol utawi ngesahang padruweyan Desa yan tan kasungkemin olih Krama Desa ring paruman.

Palet .....

Palet 6

Sukertan Pamitegep

Kaping 1

Karang, Tegal lan Carik

Pawos 27

- (1) Krama Desa pangamong Karang Desa utawi karang gunakaya patut ngawatesin karang inucap antuk tembok utawi pagehan mangda pakantenannnya asri.
- (2) Wates sisi kaler miwah kangin patut kakaryanin olih sang ngamong karang ayahan inucap, sane mawasta gegaleng kaluan, sajawaning tanah pacatu, tegal, carik utawi tanah padruweyan ngaraga, sane kapiara watese sisi kelod miwah kauh utawi manut drestha reh punika mawasta gegaleng kateben.
- (3) Prade karasayang pagehan/turus inucap ngalikadin, yen pada arsa panyandinge, kengin watese nganggen pinget kewanten, kasaksinin olih Prajuru/Dulun Desa utawi pracihna pal saking Sang Ngawawenang.
- (4) Prade wenten karang kabebeng /embet mangda kautsahayang wenten pamarginnya,manut paigum lan pararem.
- (5) Tan kengin luwire :
  - ha. ngentungang luhu, wangken wewalungan ka pakarangan/tegal anak lian, ka margine utawi ka tukade;
  - na. ngembahang toya wit saking badan wewalungan, kakus, pasiraman, pawaregan miwah sane sewosan ka tegal, carik, ka margine, utawi ka tukade sane ngawinang ambu kawon;
  - ca. prade wenten sakadi ring ajeng keni pamidanda manut pararem.

Pawos 28

- (1) Sinalih tunggil Krama Desa/Banjar tan kalugra :
  - ha. Ngalah-alah margi, tegal, ayahan Desa, karang Desa, lan sapanunggalanya;
  - na. ngalah-alah tanah linggih kahyangan, tegak setra, lan sakancan linggih sinanggeh suci.
- (2) Prade wenten sakadi ring ajeng ,sang ngalalah wenang ngawaliang tanah inucap saha keni pamidanda manut pararem kadulurin upakara prade ngalah-alah tanah suci.

Kaping.....

Kaping 2

P e p a y o n a n

Pawos 29

- (1) Ngawit nandur pepayonan tanem tuwuh patut adepa agung (1,5 meter) ngajeroang saking wates,prade jantos ngaliwat wates wenang kasepat gantungin.
- (2) Yening wenten tatanduran ngungkulin,samaliha mawastu mayanin kapisaga patut kawara antuk paiguman ping ajeng mangda prasida sang nruwenang wit ngarebah utawi notor .
- (3) Prade sampun kawara taler tan wenten usaha sang nruwenang wit,sang rumasa katetehan/kajerihan wenang masadok ring prajuru/Dulu,tur risampun kaparitas kalugra mademang wit inucap,sakewanten patin pepayonan patut katawur manut pangeloika sane nepasin.
- (4) Sang keni pamidanda panyangaskara saha prabeya manut pararem arep ring wewangunan sang karubuhin,luwire;  
ha. Sang nruwenang wit sinanggeh mayanin,prade pungkut ngarubuhin wewangunan krama tiyos;  
na. Sang notor,munggul utawi ngarebah taru tur ngarubuhin krama tiyos.
- (5) Prade wenten wit mentik sajronin wates patut kapademang, mangda tan ngranayang wicara. Prade sampun ageng kapademang, wit punika pinara tiga :  
ha. Apah tiga katur ring sang nruwenang wit.  
na. Apah tiga katur ring sang panyandingnya.  
ca. Apah tiga katur ring Desa Pakraman.
- (6) Krama Desa patut ngamanggehang kawerdian tanem tuwuh sane ngawinang Desane asri.

Kaping 3

W e w a n g u n a n

Pawos 30

- (1) Nyabran ngawangun patut :  
ha. masadok ring Prajuru / Dulu, ping ajeng prade wewangunan nganinin wates;  
na. ngangge sukat asta bhumu miwah gagulak asta kosala - kosali, sanistane manut ring patitis niskala;  
ca. tan nyayubin kapisaga.  
ra. tan dados ngembahang toya wit saking jempeng/W.C, miwah belengbeng/bada ka pisaga.
- (2) Prade wewangunan jantos nyayubin bilih-bilih temboke ring telengin wates, risampun kawara tur kasadokang ring Prajuru/Dulu, wenang kadanda manut pararem saha tembok inucap kagubar utawi sanistane mangda kakaryanang abangan.

Kaping.....

Kaping 4  
W e w a l u n g a n

Pawos 31

- (1) Warga Desa sane mamiara wewalungan patut sayaga nitenin negul/ngalogor mangda tan ngarusak karang utawi pabianan Krama sewos, bilih-bilih jantos ngaranjing ngaletihin Kahyangan.
- (2) Prade wenten wewalungan malumbar utawi ngeleb ngarusak pakarangan/pabianan Krama sewos, risampun kawara dados kataban tur kadanda ngawaliang wit sane karusak saha nawur panebas papiaran tetabanan, manut pangeloikan Prajuru/Dulun Desa.
- (3) Prade wenten wewalungan malumbar utawi ngeleb ngarusak pakarangan/pabiyan krama sewos sadurung kawara saget kapademang, sane mademang keni danda ngawaliang ka jati mula pinaka kaiwan-gan ipun.
- (4) Prade jantos ngaletihin linggih suci, minakadi Pamrajan, risampun kaparitatas olih Prajuru/Dulu wenang sang nruwenang kadanda mabuhu agung ( caru eka sata, maduluran tebasan prayascita durmanggala ); prade ngaletihin Kahyangan Desa utawi Pura Pamaksan, wenang nyaronin antuk Panca sata makerep itik belang kalung.
- (5) Krama desa patut nyanggra wewalungan miwah sarwa prani, tan kapatutang ngamademang paksi, nuba ulam, miwah sane sewosan. Prade wenten malaksana sakadi punika keni pamidanda manut pararem tur kaaturang ring sang Ngawawenang.

Kaping 5  
B h a y a

Pawos 32

- (1) Pariindik bhaya, luwire : jiwa bhaya, artha bhaya (kapandungan), dura cara ring Agama.
- (2) Sang manggihin kahanan jiwa bhaya, patut nepak kulkul bulus mapitulung manut pawos 19 (3) aksara ha.
- (3) Prade ring Desa kahanan jiwa bhaya, patut Desane ngaturang Bhuta Yadnya, tur sang mayanin kaaturang ring Sang Ngawawenang.
- (4) Prade wenten jatma mamisuh utawi nguman-uman jadma tiyos, kakenanin pamidanda beya pacamil maduluran tebasan prayascitta.
- (5) Yaning wenten jatma majengilan ring bale Banjar, ring Pura, utawi ring genah sane kasinanggeh suci, keni pamidanda manut pararem, maduluran panyangaskara prade sang majengilan kantos ngamedalang rah.

Pawos 33

- (1) Sang manggihin kahanan artha bhaya (kamalingan), patut ngulkul mapitulung manut ring pawos 19 (3) aksara ha utawi sang kamalingan atur supekta ring Prajuru / Dulun Desa sane pacang nimbangin utawi nandanin manut pararem, saha maweweh panyangaskara prade wenten jatma ngamaling barang sinanggeh suci.

(2) Pratingkahe.....

- (2) Pratingkahe mapailon ring dusta kabawos saruron, prade wenten jatma manggihin maling tan nyadokang ring Prajuru/ Dulu jantos jatma tios nyaduang, patut kadanda kadi dandaning maling, sakweh pangargan wit manut cacakan Banjar, tur prade jantos ping tiga malaksana asapunika wenang kasukserah ring sang Ngawawenang.
- (3) Prade wenten jadma ngarereh reramon, minakadi daun kelapa, ron miwah sane sewosan tanpa sadok ring sang nruwenang wit, prade kacunduk (katara) patut kadanda kadi dandaning maling.
- (4) Yening wenten jatma ngaranjing kapakubon wiadin pakarangan jatma tiyos rikala suwung, mawastu sang madruwe karang kaicalan, wenang jatma inucap katuwekang antuk madewa saksi ring Pura Bale Agung.
- (5) Mangda tan katuwekang manut sakadi ring ajeng, asing-asing ngaranjing kapakubon jatma tiyos patut :
  - ha. matengeran suwara (makaukan);
  - na. nyantos sang nruwenang karang rawuh utawi masadok ring pangapit pinih tampek, maka buatan pangaranjinge;
  - ca. pamedal karangnya kadagingin sawen, maka cihna pangarah rikala suwung.

#### Kaping 6

#### Panyanggran Banjar

#### Pawos 34

- Krama Desa rikala ngawentenang karya suka-duka, patut kasanggra olih Banjar, luwire :
- ha. Prade ngawangun Pitra Yadnya utawi Manusa Yadnya, manut pinunas sang mayadnya;
  - na. Pangarombo utawi karya gotong-royong krama jantos ping tiga, langkungan ring punika patut katuran pangingu;
  - ca. Pangingu rikala Pitra Yadnya manut abot dangan Yadnya, prade saking semengan ngantos wengi katuran pangingu ping kalih.
  - ra. Pangarombo tiyosan manut pararem.

#### CATHURTAS SARGAH

#### SUKERTA TATA AGAMA

#### Palet 1

#### Indik Dewa Yadnya

#### Pawos 35

- (1) Kahyangan Panyiwian ring sawidangan Desa Pakraman Cebok, luwire:
  - ha. Kahyangan Tiga, Pura Desa/Bale Agung, Puseh miwah pura Dalem lan Prajapati;
  - na. Pura Catur Bhuwana;
  - ca. Pura Taman;
  - ra. Pura Ratu Gede Panyarikan;
  - ka. Pura Danu Buwung;
  - da. Pura Dugul Cebok;

ta. Pura.....

ta. Pura Dugul Padang Tengah;  
sa. Pura Masceti;  
wa. Pura Pura Dadia Pulasari;  
la. Pura Dadia Bendesa Mas;  
ma. Pura Dadia Pasek Gelgel;  
ga. Pura Dadia Bendesa Gelgel;  
ba. Pura Dadia pasek AAN;  
nga. Pura Dukuh Tengah Padang;  
pa. Pura Goa Kreteg.

(2) Rahina Piodalan ring soang-soang kahyangan inucap, kadi ring sor;

ha. Ring Kahyangan tiga, luwire;  
1) Pura Desa/Bale Agung, rikala Purnamaning Kadasa;  
2) Pura Puseh, rikala Buda Umanis Julungwangi;  
3) Pura Dalem, rikala Anggara Kliwon Medangsia;  
na. Pura Prajapati rikala Anggara Kliwon Medangsia;  
ca. Pura Catur Bhuwana rikala Buda Wage Klawu;  
ra. Pura Taman rikala Soma Kliwon Landep;  
ka. Pura Ratu Gede Panyarikan rikala Saniscara Umanis Watugunung;  
da. 1) Pura Danu Buwung rikala Anggara Kliwon Prangbakat;  
2) Pura Ngetebasin rikala Saniscara Kliwon.  
ta. Pura Dugul Cebok piodalannya manut dewasa, mapag toya;  
sa. Pura Dugul Padang Tengah piodalannya manut dewasa, mapag toya;  
wa. Pura Masceti rikala Anggara Kliwon Dukut;  
la. Pura Dadia Pula Sari rikala Anggara Kliwon Perangbakat;  
ma. Pura Dadia Bendesa Mas rikala Buda Umanis Dukut;  
ga. Pura Dadia Pasek Gelgel rikala Anggara Kliwon Julungwangi;  
ba. Pura Dadia Bendesa Gelgel rikala Anggara Kliwon Perangbakat;  
nga. Pura Dadia Pasek AAN rikala Waraspati Kliwon Wara Ukir;  
pa. Pura Dukuh Tengah Padang rikala Anggara Kliwon Prangbakat;  
ja. Pura Goa Kreteg rikala Bhuda Wage Klawu.

(3) Pangaci ring Pura inucap manut kecap sastra Agama, saha kalaksanayang nista, madia, utama manut kawentenan lan pararem.

(4) Pangempon soang-soang Pura manut dresta kadi ring sor:

ha. Pura Puseh, kaempon olih Desa Pakraman;  
na. Pura Bale Agung, kaempon olih Desa Pakraman;  
ca. Pura Catur Bhuwana, Pura Gua Kreteg kaempon olih Banjar;  
ra. Pura Taman kaempon olih Desa Pakraman;  
ka. Pura Dalem lan Prajapati kaempon olih Banjar Pakraman;  
da. Pura Ratu Gede Panyarikan kaempon olih Banjar Pakraman;  
ta. Pura Danu Buwung kaempon olih Banjar Pakraman;  
sa. Pura-Pura siwosan, minakadi;  
1) Pura Dugul Cebok, kaempon olih Warga Subak;  
2) Pura Dugul Padang Tengah, kaempon olih Warga Subak;  
3) Pura Masceti, kaempon olih Warga Subak;  
4) Pura Dadia Pula Sari, kaempon olih Warga Pula Sari;  
5) Pura Dadia Bendesa Mas, kaempon olih Warga Bendesa Mas;  
6) Pura Dadia Pasek Gelgel, kaempon olih Warga Pasek Gelgel;  
7) Pura Dadia Bendesa Gelgel, kaempon olih Warga Bendesa Gelgel;  
8) Pura Dadia Pasek AAN kaempon olih warga pasek AAN;  
10) Pura Dukuh Tengah Padang kaempon olih Krama Dukuh

Pawos.....

(1) Ring soang-soang Pura inucap patut kaadegang Pamangku;

(2) Ngadegang Pamangku manut dudonan :

ha. Nyanjan utawi masemurang, soang-soang mapiteges mapinunas  
ring ajeng Pura wiadin kadura Desa manawi ring balian  
konteng, lan sapanunggilannya;  
na. Turunan utawi waris;  
ca. Kacatri olih krama Desa.

(3) Tan kawenang adegang Pamangku luwire :

ha. Cendangga makadi peceng, perot, cungh lan sapanunggilan  
ipun;  
na. Sang sapisira ugi sane tan kapatutang manut pararem;  
ca. Sakit ila, ayan, buduh wiadin edan;  
ra. Sane tan madrebe kasucian urip.

(4) Prabia kapamangkuan :

ha. Adiksa Widhi ( ngawintenin ) lanang istri kamedalin saha  
kalaksanayang olih sang ngadegang, makadi krama Desa utawi  
pangempon Pura soang-soang;  
na. Mapitra Yadnya riwekas lanang miwah istri patut kasungkemin  
oli Krama Desa utawi pangemong, sanistane Brahmaprayascita,  
panyanggrane manut pararem prade Yadnya inucap kalaksanayang  
oli wargan sira pamangku.  
ca. Sinalih tunggil krama yan wenten ngipik-ipik sapari polah  
pamangku, nanging pamangku tan sapunika pari polahnya kadi  
sane kaipik-ipik, wenang jadma inucap kasisipang nyuciang  
pamangku, manut pararem.

(5) Pamangku patut ngamanggehang sesananing Pamangku luwire :

ha. Ambek Dharma sadhu;  
na. Asewaka Dharma, makadang sastra utama;  
ca. Tan parek ring naya dustha;  
ra. Tan atayub ring tarub camara yudha;  
ka. Tan manjing ring umah wong banija karma;  
da. Tan manjing ring umah wong darati krama;  
ta. Tan wenang ajajuden;  
sa. Tan anginum asing angawe mada;  
wa. Tan pati pikul-pikulan;  
la. Tan salah euluh;  
ma. Tan wenang anayub upadrawaning cor, yan mawiyawahara teka  
wenang adewa saksi;  
ga. Tan griganing wong akweh;  
ba. Tan keneng cuntakaning wong len, sajawanin kulawarganya  
tunggil natah, utawi pasiwanya manut dresta;  
nga. Tan wenang arabi wong balu, sapihan, istri larangan.

(6) Prade mamurug, wenang Pamangku nyepuhin raga kasaksinin olih  
Prajuru Desa.

(7) Yan pacang ngawalat rabi wenang ngaturang rumuhun pawintenanya,  
ring pura genahnya madeg pamangku nguni, tembenya wawu wenang  
ngawalat rabi, riwus upacaraanya wenang ngawana wasa salaminya  
atahun, wus punika wawu mawinten lakibi kadi pawintenanya nguni.

Pawos.....

Pawos 37

Swadharman Pamangku luwire :

- ha. Ngenterang upacara piodalan ring Kahyangan utawi ring soang-soang pakubon krama;
- na. Prade salah sinunggil Pamangku kapialang utawi cuntaka, kengin nguntap Pamangku kahyangan desa tiosan utawi nuwur sang sulinggih;
- ca. Samaliha yan sampun Pamangku ngayah ring Pura kancit wenten kulawargannya seda, Pamangku inucap tan keneng cuntaka sakewanten Pamangku tan budal salami piodalan.

Pawos 38

Patias utawi olih-olihan Pamangku luwire :

- ha. Tri Baga sarin canang ring Pura miwah sarin canang ring soang-soang pakubon krama Desa;
- na. Upon palaba carik manut pararem;
- ca. Luput pakaryan, rerampen/reramon;
- ra. Patias sewosan manut pararem.

Pawos 39

(1) Pamangku kagentosin riantukan :

- ha. S e d a ;
- na. Pinunas ngaraga, sangkanin kageringan lan sapanunggalannya;
- ca. Kauwusang olih krama sangkanin malaksana sane tan patut.

(2) Prade Pamangku kauwusang sangkaning malaksana tan patut keni pamidanda manut pararem saha ngawaliang prabiya pawintenannya pecak.

Pawos 40

Kasukertan Kahyangan kadi ring sor :

ha. Tan kalugra ngaranjing kapura luwire :

- 1) Sang katiben cuntaka makadi sebel ring raga utawi kapademan;
- 2) Makta sahanan barang sinaggeh ngaletihin;
- 3) Sato agung, sajawaning rikala mapepada;
- 4) Mabusana sane tan patut kadi tatacaraning ngaranjing kapura;
- 5) Sedereng polih wak-wakan (pituduh ) Prajuru /Dulun Desa.

na. Pratingkahe tan wenang ring Pura :

- 1) Masumpah ( cor ) sajawaning pituduh Prajuru/Dulun Desa;
- 2) Wak paruseya/wak capala, makobetan, masasenengan, makolem dados asiki lanang wadon, mabacin, mawarih, macecepin rare, majaljal/majengilan, nyangsang busana, menahin pusungan (santukan punika rikala majejahitan patut magelung busung macingor lidinya);
- 3) Mungga tedun palinggih sajawaning pituduh Prajuru/Dulu.

ca. Sang mamurug kecap ring ajeng keni pamidanda pamrayascitta sapatutnya.

Pawos.....

Pawos 41

- (1) Yan wenten jadma karawuhan ring Pura, dados kapintonin prade rumasa kasumangsayan, yan tan wiakti, jatma inucap kasisipang manut pararem.
- (2) Prade Kahyangan kahanan durmanggala, minakadi kené bhaya Pamangku/Sang manggihin, patut digelis nyadokang ring Prajuru/Dulu mangda marumang krama Desa tur ngawentenang pamrayascitta sapatutnya.

Palet 2

Indik Resi Yadnya

Pawos 42

- (1) Sang pacang madeg Pandita utawi Pinandita minakadi Balian Sonteng, Kubayan, Dalang, sakaluwiring sane jagi ngenterang Yadnya patut masadok ring Prajuru Desa utawi Parisada Hindu Dharma Indonesia.
- (2) Prajuru Desa patut ngawas nitenin tur wenang ngalangin prade wenten kacihnén nyasar ring kakedap miwah drestane, tur sareng nyaksinin upacara saha nyobyahang ring paruman Desa tegap rawuhing wates kawenangannya ngenterang yadnya.
- (3) Krama Desa patut ngaturang ayah sapamadeg miwah ring pangelepas Sang Sulinggih riwekas katuntun olih Prajuru/Dulun Desa.

Pawos 43

- (1) Sang Sulinggih lan pamangku patut ngariyining muputang ring wawidangan Desa Pakraman Cebok, sasampun punika wawu muputang yadnya kajebar tiwas Desa utawi kadura Desa.
- (2) krama desa sami patut sareng ngawas nitenin katuntun olih Prajuru/Dulu-dulu, mangda sahanan yadnya sane kawentenang kaicen pamuput olih Padanda/Sulinggih utawi Pinandita manut kawenangannya soang-soang.

Palet 3

Indik Pitra Yadnya

Pawos 44

Pamargin Pitra Yadnya madudonan manut sakadi ring sor :

na. Pangupakaran Sang kalayu sekaran :

- 1) entuk mendem utawi ngeseng, makacihnén pakingsan ring ibu Pratiwi utawi ring geni, salami ngantos padewasan;
- 2) Atiwa-tiwa (upakara pangabenan / palebon).

na. Upacara upakara Pitra Yadnya riwusan kaabenang ngraris munggah daun bingin (ngroras) manut dudonan Atma Wedana.

Pawos.....

Pawos 45

Swadharmaning lan tategenan prade wenten sinalih tunggil Krama kalayu sekaraan :

ha. Sang kaduhkitan patut :

- 1) nyadokang ring Kliyan tur nunas tatimbangan ring kawentenannya;
- 2) ngaturin Banjar ngarombo makarya eteh-ete sawa saha ngater kasetra, tur katuran panyambrama canang sasida-sidaan.

na. Swadharmaning Banjar :

- 1) Kliyan Banjar maritatas pamargin sang kaduhkitan, napike pacang kapendem, makingsan riyin utawi lantur kaabenang;
- 2) Prade kapendem, raris kaswarayang kulkul pamitahu manut pawos 19 (3) aksara na olih Kliyan Banjar utawi wakilnya.
- 3) Panyanggran Banjar salanturnyane :
  - ha) soang-soang Krama Banjar nedunang patus beras, adeng kelapa, miwah manut pararem.
  - na) ngarombo ngaryanin eteh-ete sawa, kasarengin olih Krama sane rawuh ngarombo.
  - ca) sami Krama banjar nganter kasetra jantos puput pamendemane.

ca. Tan kengin ngalelet langkungan ring 7 (pitung) rahina sajawaning pacang kapalebonang, tur patut polih pagebagan manut paetengan Kliyan patus / Banjar.

ra. Tan kalugra nginepang bangbang miwah mendem rikala:

semut sadulur,  
kala gotongan,  
Pasah,  
Kliwon, kajeng Kliwon,  
Soma, Umanis, Taulu,  
Was panganten,  
Ingkel wong,  
Prawani, Purnama, Tilem,  
Rerahinan jagat.

ka. Prade wenten kalayu sekaran rikala piodalan, kengin mendem tanpa sadok, tan nyuwarayang kentongan/kukul tur mamargi wengi/sasiliban.

da. Pamargin pamendeman utawi palebonan mangda nganutin sastra agama lan dresta.

Pawos 46

(1) Sane kasinanggeh kacuntaka sakadi ring sor :

- ha. cuntaka antuk kalayu sekaran;
- na. cuntaka antuk ngraja swala;
- ca. cuntaka antuk ngembasang putra;
- ra. cuntaka antuk karuron;
- ka. cuntaka antuk sakit ila, buduh;
- da. cuntaka antuk pawiwahan;
- ta. cuntaka antuk gamis gamana;
- sa. cuntaka antuk salah timpal;

wa. cuntaka.....

- wa. cuntaka antuk yening wenten anak istri mobot nenten kaupakarayang pabiukawonan miwah pawidiwidana;
- la. cuntaka antuk mamitra ngalang;
- ma. cuntaka antuk yening wenten anak istri ngamedalang putra sadurunge maupakara pabiukaonan miwah pawidiwidana;
- ga. cuntaka antuk sad Tatayi.

(2) Sengker cuntaka manut kawentenannya:

- ha. cuntaka kalayu sekaran, cuntakanya kaanutang ring loka dresta Desa Pakraman soang-soang;
- na. cuntaka ngraja swala, 3 rahina ngawit saking ngraja swala utawi salamining ngeraja swala;
- ca. cuntaka ngembas putra, sane istri ngantos rarene mayusa 3 sasih sane lanang ngantos kepus odel. Ngawit saking putrane embas, utawi ngantos sampun kaupakarayang makakambuhen lan maperayascita manut sastra Agama, lanang wiadin istri;
- ra. cuntaka karuron, cuntakanya abulan pitung rahina (42 rahina) tur sampun matirta pamerayascita;
- ka. cuntaka sakit ila, buduh/edan, cuntakanya manut ilikita pastika saking Sang Ngawawenang/sang nambanin miwah sampun mrayascita raga;
- da. cuntaka pawiwahan, cuntakanya ngatos sesampune matirta pabiukaonan;
- ta. cuntaka gamia gamana, cuntakanya ngantos sesampune kapalasang/kasapihang tur sampun kawentenang pamrayascita raga miwah pamrayascita Desa Pakraman/Kahyangan;
- sa. cuntaka salah timpal kapuputang manut ring sastra Agama Hindu;
- wa. cuntaka anak istri mobot nenten kawentenang upakara pabiukaonan, cuntakanya ngantos kawentenang upakara pabiukaonan;
- la. cuntaka mamitra ngalang, cuntakanya ngantos kawentenang upakara pabiukaonan;
- ma. ngembasang putra nenten kawentenang upakara pabiukaonan miwah pawidiwidana, cuntakanya ngatos wenten sane mameras sang putra, lan sampun kawentenang upakara manut ring sastra Agama Hindu;
- ga. cuntaka Sad Tatayi, cuntakanya ngantos sampun maprayascita raga tur nenten pisan dados ngamungganghang upacara padwijatian.

(3) Cuntaka kalayu sekaran/kapademan :

- ha. Kapendem cuntakanya :
  - 1) cuntaka/sebel kabanjar ngantos 3 rahina riwusnya mendem/manut dresta utawi sesampun polih pamrayascita.
  - 2) kulawargania sajeroning pakarangan ngantos 11 rahina/manut dresta.
  - 3) pangapit ngantos 7 rahina.
- na. Kaabenang cuntakanya :
  - Sang nyambut karya Pitra Yadnya cuntakanya ngawit saking nyambut padewasan karya, wusan mapegat kalanturang malih tigang rahina.

(4) Sane.....

(4) Sane katiben cuntaka luwire :

- ha. Kalayu sekaran sane kacuntaka :
  - 1) sang sane kalayu sekaran;
  - 2) kulawarganya;
  - 3) bebanjaran;
  - 4) Pangapit.
- na. Ngraja swala sane kacuntaka :
  - Sang sane ngrajaswala.
- ca. Ngembas putra sane kacuntaka :
  - Kawulawarganya sane ngembasang putra lanang wiadin istri.
- ra. Pawiwahan sane kacuntaka :
  - Sang sane ngalaksanayang pawiwahan lanang wiadin istri.
- ka. Sakit ila, buduh, sane kacuntaka raganya dewek.
- da. Karuron sane kacuntaka:
  - Kawulawarganya lanang wiadin istri.
- ta. Gamia gamana sane kacuntaka :
  - 1) Sang sane ngalaksanayang gamia gamana;
  - 2) Desa Pakraman nyane/kahyangan.
- sa. Salah timpal sane kacuntaka :
  - 1) sang sane malaksana salah timpal;
  - 2) kulawarganya;
  - 3) Desa Pakraman/kahyangan.
- wa. Anak istri mobot nenten kawentenang upacara pabiukaonan sane kacuntaka :
  - Sane maraga istri (sane mobot)
- la. Mamitra ngalang sane kacuntaka :
  - Sane ngalaksanayang mamitra ngalang.
- ma. Ngembas putra nenten kawentenang upakara pabiukaonan miwah upakara pawidi-widana sane kacuntaka :
  - 1) Sang sane ngembasang putra;
  - 2) Putra sane mbas.
- ga. Sad Tatayi, sane kacuntaka :
  - Sang malaksana Sad Tatayi.

(5) Tan keneng cuntaka, luwire :

- 1) Sang sulinggih lan Pamangku Kahyangan tiga/Bendesa Pakraman;
- 2) Rikala piodalan risampun ngalang sasih/ngalang tengah.

Pawos 47

(1) Atiwa-tiwa (pangabenan) kalaksanayang antuk :

- ha. Sawa prateka, pangabenan mawatang sawa;
- na. Sawa reei, pangabenan mawatang antuk sawa kresyan;
- ca. Suwasta, pangabenan mawatang sawa sane tan kakeniang, kagentos antuk lalang utawi toya.

(2) Panamayan pangabenan wenten kalih pawos :

- ha. Ngaben dadakan/bah bangun manut pararem;
- na. Ngaben ngamasa, manut pararem.

(3) Dudonan pangabenan ngawit saking ngagah (seda), ngeseng ngantos pangiriman utawi nganyut.

Pawos.....

Pawos 48

- (1) Pepatusan pangabenan wenten kalih pawos :

ha. Ngaben ngamasa luwire : beras, ayam, kelapa, gesing, papah  
jaka, kelangsah miwah sane sewosan manut pararem.  
na. Ngaben dadakan, pateh sakadi patus beda kependem.

- (2) Pangingune ring Krama banjar ngawit ngayah manut abot dangan  
kawentenan karya.

Palet 4

Indik Manusa Yadnya

Pawos 49

- (1) Manusa Yadnya inggih punika upacara-upakara dharmaning kahuripan  
manusa, ngawit sakeng patemoning kama bang kalawan kama petak  
sajeroning garbha ngantos kalayu sekaran riwekas.

- (2) Upacara ring ajeng madudonan sakadi ring sor :

ha. magedong-gedongan duk pangerempinian ibiang;  
na. duk sang kamareka medal;  
ca. kepus odel;  
ra. roras rahina;  
ka. tutug kambuhan (42 rahina);  
da. nigung sasihin ( 3 sasih );  
ta. pawetuan/otonan/odalan (6 sasih);  
sa. tutug kelih (ngraja swala wadone, ngembakin lanange)  
wa. matatah/mapandes;  
la. mawiwaha;  
ma. mawinten.

- (3) Upacara-upakara inucap nista, madia, utama manut sastra Agama  
Hindu lan dresta.

Palet 5

Indik Bhuta Yadnya

Pawos 50

- (1) Bhuta Yadnya inggih punika upacara-upakara byakala ring Pratiwi  
lan Kahyangan, sarwa prani saha upacara-upakara ring babutan  
miwah ring piranti sewosan.

- (2) Upacara pabyakala ring sarwa prani, sarwa tumuwuh muwang piranti  
luwire :

ha. Ring sarwa lelandep rikala Saniscara Kliwon wara Landep;  
na. Ring sarwa tumuwuh lan piranti rikala Saniscara Kliwon wara  
Wariga;  
ca. Ring sarwa syandana/wahana rikala Saniscara Kliwon wara  
Kuningan;

ra. Ring.....

- ra. Ring sarwa lelanguan rikala Saniscara Kliwon wara Krulut;
- ka. Ring sarwa ingon-ingon/ wewalungan rikala Saniscara Kliwon wara Uye;
- da. Ring sarwa ringgit, ukir-ukiran rikala Saniscara Kliwon wara Wayang;
- ta. Upacara pakala-kalan manusa manut widana, kabawos pabyakala.

(3) Upacara pabyakala ring Pratiwi, Kahyangan lan Babuthan kawastaning macaru.

(4) Pacaruan inucap ring ajeng nista, madia, utama, manut wiguna kadi ring sor :

- ha. Ekasata;
- na. Panca sata;
- ca. Panca sanak;
- ra. Resi gana;
- ka. Tawur Agung;
- da. Panca kelud;

(5) Sajawaning kadi ring ajeng kawentenang upakara :

- ha. majot-jotan utawi yadnya sesa nyabran wusan ngarateng;
- na. masapuh-sapuh rikala pacang wali ring pura;
- ca. Pacaruan pasasihnan kalaksanayang nangken Tilem ngawit sasih ka 5, 6, 7, 8, lan ka 9, sajawanin wenten durbiksan jagat.

#### Pawos 51

(1) Nangken ngawarsa rikalaning Tilem kasanga kawentenang tawur kasanga, kalanturang antuk ngarupuk, makacihna pacang mapag rahina panyepian benjangne.

(2) Brata panyepian sane kamargiang olih krama Desa;

- ha. amati geni; tan kengin maapi-api;
- na. amati karya; tan kengin nyambut karya;
- ca. amati lelanguan, tan kengin maoneng-onengan, masuwara gora, lan sapanunggalannya.
- ra. amati lelungan, tan dados malancaran.

(3) Pabratan inucap kamargiang sakeng semeng ngantos semeng benjangne raris kasuwarayang kulkul punika cihna pangembak.

(4) Sang mamurung kecap ring ajeng keni pamidanda manut pararem Banjar/tempek soang soang kamargiang olih patelik (pacalang Desa).

(5) Riwus rahina Nyepi (benjangne) maka cihna pangawit Isaka Warsa, patut warga Desa sami madharma Santi.

Pancama.....

PANCAMA SARGAH  
SUKERTA TATA PAWONGAN

Palet 1

Indik Pawiwahan

Pawos 52

- (1) Pawiwahan inggih punika patemon purusa kalawan pradana, malarapan panunggalan kayun suka lila kadulurin upasaksi sakala niskala.
- (2) Pamargin pawiwahan luwire :
  - ha. Pepadikan, kamanggala antuk pakrunayan;
  - na. Ngarorod, marangkat riyin wawu kakrunayang;
  - ca. Nyeburin utawi sentana nyeburin (risampun nganutin upakara pamerasan);
- (3) Pidadab sang pacang mawiwaha patut :
  - ha. sampun manggeh deha - teruna (prasida nganutin Undang-undang);
  - na. sangkaning pada lila (tan kapaksa);
  - ca. manut kecap sastra Agama ( tan gamia gamana );
  - ra. kasudiwadani prade pangambile tiros Agama, utawi kapatiwangi.
- (4) Pamargin pawiwahan mangda taler nganutin Undang-undang Perkawinan sakeng Sang Ngawawenang.

Pawos 53

- (1) Pawiwahan sane kapatutang ring Desa, sakadi ring sor :
  - ha. sampun kamargiang pabyakala utawi pasakapan, kasaksiang sakala niskala olih Pandita utawi Pinandita;
  - na. wenten pasaksi Prajuru/Dulu-dulu sane mapakelingang utawi ngilikitayang pawiwahan;
  - ca. sampun matengeran suwaran kulkul;
  - ra. pawiwahan inucap ring ajeng sampun kacatetang ring sang Ngawawenang.
- (2) Parabian sane tan manut kadi kecap ring ajeng sinanggeh tan patut.

Pawos 54

Tata caraning parabian patut sakadi sor :

- ha. Sapa eira ugi-pacang ngawararang pakulawarganya patut masadok ring Prajuru/Dulu-dulu, salanturnya Prajuru/dulu maritatas manut tan manut pamargin parabiane;
- na. pamargin pepadikan manut dudonan :

1) Pakrunayan.....

- 1) Pakrunayan jantos ping tiga, saha soang-soang malarapan:  
ha) kapertama antuk canang /sedah;  
na) kaping kalih antuk canang pangrawos;  
ca) kaping tiga antuk daksina pajati kabawos pamuput pamadikan.
- 2) risampun puput raris sang istri kaajak budal ring pakubon sang-lanang, saha kalanturang antuk pabyakala.
- 3) mangda puput tumus sakala niskala, raris kulawarga purusa makta pajati ring Pamarajan wadone.

ca. Prade ngarorod/marangkat patut :

- 1) reraman lanange ngawentenang pamilaku/pangenduh antuk duta sakirangnya 2 (kalih) diri;
- 2) pagenahan antene tan kengin ring pakubon sang lanang sadereng mabeyakala.

ra. Sajeroning pakrunayan/pangalukuan patut :

- 1) kamanggala antuk geng pangampura arep ring reraman wadone;
- 2) kaigumang bawos idih pakidih utawi palegayan arep ring pasewakan sang ngidih saha dewasa pakerabkambeyane riwekas;
- 3) kacihnayang indik kapurusa utawi prade sentana rajeg kajejerang kapatut ngidih anak lanang sane kabawos pawiwahan nyeburin, tur risampun sulur pamerasan kategepin kamanggehang sentana nyeburin;
- 4) prade tan terima pajati, pakrunayan kamargiang jantos ping tiga.

ka. pakerab-kambeyan mapiteges upacara tinas apadang (puput) mapakuren, dwaning manut sakadi ring sor :

- 1) Sajeroning kabawos ambe, kalaksanayang ring sakala niskala masarana jejauman miwah pawidi widana :  
ha) jejauman pinaka ngambe/ngadungang kayun soang-soang pakulawargan wadone;  
na) widi widana pinaka pajati niskala nunas wadone ring Pamrajanya.
- 2) Sajeroning bawos kerab pamargi ring sakala :  
ha) antuk panyaksi Krama Banjar, dwaning kaparabiang matengeran swaran kulkul;  
na) pamekas pasaksi Prajuru / Dulu-dulu sane ngilikitayang.

Palet 2  
Indik Nyapian

Pawos 55

- (1) Pawiwahan prasida kawusang malarapan antuk palas parabian utawi kapademan.
- (2) Wusan mapakuren riantukan salah sinunggal seda mapiteges balu, makadi balu lanang/istri.
- (3) Palas parabian inggih punika sangkaning mawiwit wicara.
- (4) Sang ayat palas marabian patut atur supeksa pailikitan riyin ring sang Rumawos wastu tinas apadang pamutuse kabawos nyapian wawu Prajuru nyobyahang kawentenannya ring Desa saha keni panebas swaran kulkul manut pararem.

Pawos.....

Pawos 56

Tata cara palas parabian sakadi ring sor:

- ha. nawur prabeya pasaksi sinalih tunggil sami matenga;
- na. pagunakayan polih pahan pada;
- ca. pabekel, tadtadan soang-soang kakussa niri-niri miwah warisan kakussa olih purusa;
- ra. ngaweruhin miwah ngupajiwain pratisentana manut swadharmaning guru rupaka;
- ka. nawur pamidanda panebasan swaran kulkul manut pararem;
- da. ngelung jinah logika Prajuru/Dulu;
- ta. mapamit ring pamrajan lanange.

Pawos 57

Prade riwekas sang palas kacihnan adung malih, patut :

- ha. ngalaksanayang pawiwahan malih;
- na. kadenda nikel saking palase.

Pawos 58

(1) Sang balu kabinayang dados :

- ha. balu luh wit sentana (sentana rajeg) miwah balu luh boya sentana;
- na. balu muani kapurusa (wit sentana) miwah balu muani nyeburin (boya sentana).

(2) Swadharmaning balu inucap patut :

- ha. ngamanggehang patibrata tan kengin ngamargiang paradara/darati krama;
- na. nguasayang waris, pagunakaya, tan dados ngadol, ngadeang, makidihang lan siosan punika, sajawaning kabebasan olih pianak utawi kulawarga pinih tampek sakeng kurenannya prade pianak kantun alit-alit;
- ca. kengin ngidih sentana prade wenten pidabdab sadurung sinalih tunggil padem, saha kabebasan olih kulawarga sakeng kapurusa;
- ra. kawenangang mawiwaha malih, prade wenten kabebasan manut angka/aksara ring ajeng.

Pawos 59

Balu kaucap tan pageh sakadi ring sor :

- ha. daratikrama utawi paradara;
- na. matilar saking pakubon tan pasadok jantos 6 (enem) sasih;
- ca. lempas ring swadharma sewos-sewosan, tan prasida ngesehin solah maprawerti arep ring pituduh sane patut sakeng kulawarga purusa.

Palet.....

Palet 3

Indik Sentana

Pawos 60

- (1) Sentana wenten kalih pawos, sane kaucap pratisentana miwah sentana paperasan.
- (2) Pratisentana inggih punika sentana sane metu saking pawiwahan kapatut.
- (3) Prade pawiwahan tan kapatut ngawetuang sentana, mangda tan kanton kawastanin babinjat utawi astra patut kamanggala antuk panyangaskara.
- (4) Prade pawiwahan tan ngawetuang sentana kengin ngidih sentana antuk upasaksi sakala niskala sane kawastanin sentana paperasan.
- (5) Sentana rajeg inggih punika, pratisentana wadon (pradana) sane kamanggehang lanang (purusa) tur risampun ngalaksanayang pawiwahan kaceburin.
- (6) Sang sane dados kaarsayang sentana rajeg inucap wiwit angka (5), inggih punika :

ha. Pratisentana wadon tunggal;

na. Sampun kamanggehang dados pratisentana lanang (purusa);

ca. Kapawiwahang kaceburin kautamayang olih jadm sane maagama hindu utawi jadm sane maagama siyosan sane sampun ngalaksanayang pamarisuda raga utawi sudiwadani;

ra. Sane ngamanggehang sentana rajeg patut mapasadok ring Prajuru Banjar, tur I Klian Banjar patut nyobyahang ring Banjar saha ngaturang ring Prajuru Desa Pakraman.

Pawos 61

- (1) Ngangkat sentana manut dudonan patut makacihna arta brana pamerasan sane kasaksiang sakala-niskala;
- (2) Sapa sira ugi krama pacang ngidih sentana patut masadok ring Bendesa sanistane 3 (tigang) sasih sadereng pamerasan. Bendesa ngalanturang pakarsa punika ring sang ngawa wenang;
- (3) Bendesa kawakilin olih Klian Banjar nyobyahang ring sawidangan Desa, sang sapa sira ugi rumasa tan lila mangda nyadokang masengker kalih uku (14 rahina) sabanen pamerasan ring Bendesa Pakraman;
- (4) Prajuru/Dulun Desa digelis mawosin saha ngicenin pamutus nepek ring catur dresta miwah pararem;
- (5) Prade sulur paperasan tan manut kadi kecap ring ajeng, Prajuru/Dulun Desa wenang ngandeg sang pacang mameras saha ngicenin pamutus mangda kapuputang riyin bebawos, sulur utawi wicaranya.

Pawos.....

Pawos 62

- (1) Paperasan sane kapatut ring Desa risampun makacihna :  
ha. Widi-widana paperasan;  
na. Kasaksinin olih prajuru Desa sane mapakelingang utawi ngilikitayang.  
ca. Kasobyahang ring wawidangan Desane.
- (2) Sane kapatut peras angge sentana kadi ring sor:  
ha. Jatma maagama Hindu.  
na. papernahan nedunang saking sang meras ;  
ca. Kulawarga saking purusa, prade tan wenten kengin sakeng wadon, yening taler tan wenten wawu kengin sakama-kama (saking kayun);  
ra. Kautamayang saking waris pancer kapurusa;  
ka. Sinalih tunggal mawiwit saking kulawarga tunggal sanggah utawi mrajan, paibon lan dadia utawi ngambilin anak tiis sakewanten sang maagama Hindu.
- (3) Kengin ngangkat sentana langkungan ring adiri, lanang wiadin wadon, prade ngangkat sentana lanang wadon, nenten dados kapawiwahang.

Palet 4

Indik Warisan

Pawos 63

- (1) Warisan inggih punika tetamian arta brana saha ayah-ayah ngupa-di kasukertan sakala lan niskala saking kaluhurannya arep ring turunannya.
- (2) Kang sinanggeh warisan luwire:  
ha. Duwe tengah, makadi tegal, ayahan Desa, Kahyangan, pusaka siwa pakarana lan sapanunggalanya;  
na. Pamrajan;  
ca. Pagunakayan, tadtadan / jiwa dana, hutang piutang.
- (3) Wawu kengin kabawos warisan prade wenten :  
ha. Sang mapiturun ( pawaris ) ;  
na. Katurunan ( ahli waris ) ;  
ca. Arta brana miwah tategenan makacihna warisan.

Pawos 64

- (1) Ahli waris luwire :

ha. Pratisentana purusa ;  
na. Pratisentana pradana (sentana rajeg);  
ca. Sentana paperasan lanang/wadon.

(2) Prade.....

(2) Prade tan wenten sakadi ring ajeng, kang sinanggeh ahli waris :

- ha. Turunan purusa pernah ngunggahang, rerama lanang, pekak salantur ipun rerama misan, mindon;
- na. Turunan purusa pernah kasamping makadi kaponakan, misan, mindon.

Pawos 65

Swadharmaning ahli waris patut :

- ha. Nerima saha nguwasayang tetamian pahan saking kaluhuranya, makadi ngarempon sanggah, Pura saha pangupakaranya miwah nyelidihinin ayah-ayahan pawaris;
- na. ngabenang pawaris saha ngalanturang upacara-upakara pitra.
- ca. Nawurin hutang - hutang pawaris sane manut pangeloika.

Pawos 66

Pangepahan waris manut sakadi ring sor :

- ha. Risampun kalaksanayang Pitra Yadnya lan hutang-hutang pawaris buntas katawur;
- na. Para ahli waris polih pahan pada sangkaning pagunakayan, sajabaning karang / tegal, ayahan Desa kaamong olih ahli waris kang sinanggeh Krama ngarep;
- ca. Sinalih tunggil ahli waris kengin tan polih pahan prade:
  - 1) Nilar kawitan lan sesananing Agama;
  - 2) Alpaka guru rupaka;
  - 3) Sentana rajeg kesah mawiwaha utawi pratisentana nyeburin, soang-soang kabawos ninggal kadaton.
- ra. Boya ahli waris kengin muponin hasil manut dudonan luwire :
  - 1) Sentana luh salami dereng kesah mawiwaha utawi tan alpaka guru, miwah prade madrebe pianak tan kaangkenin olih wong tua rare inucap, kengin ngawaris wantah pikoli pagunakaya sentana luh inucap kemawon;
  - 2) Balu luh wiadin muani nyeburin (soang-soang boya sentana);
  - 3) Mulih deha utawi teruna, riantukan ring pawiwahane pecak sampun kabawos ninggal kadaton.
- ka. Pawaris kengin maweweh rikala maurip pinaka jiwa dana, tadtadan/ bekel, makacihna paweweh tetep ring pianak sane kesah mawiwaha.

Pawos 67

(1) Prade sajeronin pakulawargan wenten ahli waris langkungan ring adiri patut :

- ha. kawentenang paigum indik pedum waris inucap;
- na. yen tan prasida katunasang tatimbang ring Prajuru (kerta Desa);
- ca. prade taler tan wenten cumpu ring panepas Kerta Desa, kengin katumusang ring sang Rumawos.

(2) Prade.....

- (2) Prade karang inucap kaputungan, patut Prajuru/Dulu-dulu nibakang ring :

ha. sang sinanggeh ahli waris manut pawos 64;  
na. sang kengin anggen sentana manut pawos 62 angka (2) miwah angka (3);  
ca. prade taler tan wenten cumpu ring panepas Kerta Desa, kengin katumusang ring sang Rumawos.

- (3) Prade jantos karang Desa kaepah utawi kasepih, patut soang-soang nedunin makrama Desa marep.

#### SAT SARGAH

#### WICARA LAN PAMIDANDA

##### Palet 1

##### Indik Wicara

##### Pawos 68

- (1) Sane wenang mawosin makadi mutusang wicara ring Desa inggih punika Prajuru / Dulun Desa sinanggeh Kerta Desa.
- (2) Tata dudonan mawosin saha muputang wicara warga desa kadi ring sor :  
ha. Kaping ajeng kabawosin olih Kelihan Banjar.  
na. Tan cumpu ring panepas Kelihan Banjar, karerehang pamutus ring paruman banjar.  
ca. Prade tan cumpu ring pamutus Banjar, katumusang ring Bendesa Pakraman lan Kerta Desa.  
ra. Taler tan wenten cumpu ring pamutus Bendesa lan Kerta Desa katunasang ring Paruman Desa Pakraman.
- (3) Prade sang mawicara tan wenten cumpu ring pamutus paruman desa lan Kerta Desa, kengin nunasang wicara inucap ring sang Rumawos.

##### Pawos 69

- (1) Sahanan wicara mawiwit kacorahan saka luwire sinanggeh nungkasin daging Awig-awig, pararem miwah paswaran Desa/Banjar, Prajuru / Dulu patut digelis mawosin tan nyantos pasadok.
- (2) Sajaba wicara kadi ring ajeng patut nyantosang pasadok sang nunas bawos.
- (3) Panepase patut pastika nyantenang iwang patut malarapan Tri Pramana ( saksi, ilikita, bukti ) miwah tan maren nepek ring Catur Dresta.

Palet.....

Palet 2

Indik Pamidanda

Pawos 70

- (1) Desa/Banjar wenang niwakang pamidanda ring warga Desa/Banjar sane sisip.
- (2) Paniwak inucap kalaksanayang olih Bendesa/Klian Banjar.
- (3) Bacakan pamidanda luwire :
  - ha. ayahan panukun kasisipan;
  - na. danda arta;
  - ca. kanorayang;
  - ra. panyangaskara/Upacara.
- (4) Pamidanda sane katiwakang patut masor singgih manut ring kasisipane.
- (5) Jinah utawi raja brana pamidanda ngaranjing dados druwen Desa/Banjar.

Pawos 71

- (1) Krama sane langkungan ring tigang paruman ngalantur tan nawur urunan miwah dadandan wenang karampag.
- (2) Rerampagan ngangge tata cara kadi ring sor :
  - ha. Kalaksanayang olih Prajuru kasarengin olih Krama saakeha tigang diri maka saksi;
  - na. Sang ngarampang sangkanin darsana ngambil barang utawi nyawenin tanem tuwuh, akehnya manut ring utang sang karampag; Sang karampag mangda lila nyukeerahang barangnya sane dados wala;
  - ca. Prajuru/Dulu miteketang mangda barang-barang sane karampag digelis katebus, masenger awuku (7 rahina) ring kutus rahinane pacang kaadol;
  - ra. Tan nganinin saluwir barang sane patut inggilang manut Agama miwah tan mademang pangupa jiwa sang karampag.

Pawos 72

- (1) Prade sang pacang karampag ngawara (ngalangin) palaksanaan inucap mawastu sampun tan nganutin Awig-awig Desa wenang karang Desa sane kagenahin kadaut olih Desane.
- (2) Samaliha yen purun taler ngalangin palaksanaan kadi ring ajeng tan wenten pamargi sajawaning kasepekang/kanoroyang olih Krama Desane.

(3) Pamidanda.....

- (3) Pamidanda inucap ring ajeng keni buntas risampun sang kakeninin :

ha. nunas geng pangampura ring Krama Desa riantukan nguak pasubaya (pararem) pecak;  
na. nawur pangargan panguak pasubayane duk pacang karampag kadulurin pamrayascitta panyapsap kaiwangane ring Desa.

SAFTAMA SARGAH

NGUWAH - NGUWUHIN AWIG - AWIG

Pawos 73

- (1) nguwah-nguwuhin Awig-awig Desa puniki kalaksanayang ring paruman Desa.  
(2) Awig-awig puniki kamargiang ngawit kaingkupin (kararemin).

Pawos 74

- (1) Sakaluwirin sane wenten saderengnya patut kaanutang ring sadaging Awig-awig puniki.  
(2) Sakaluwiring sane durung kabawos sajeroning Awig-awig puniki patut kalaksanayang manut tata cara sane sampun mamargi kadulurin antuk pararem-pararem.

ASTHAMA SARGAH

SAMAPTA

Pawos 75


- (1) Awig-awig puniki kararemin olih Krama Desa Pakraman Cebok duk rahina Anggara Wage Wuku Pahang pananggal ping 14 sasih Kapat isaka 1923 tanggal Masehi 30 Oktober 2001 ring wantilan Desa Pakraman Cebok.  
(2) Awig-awig puniki kalingga tanganin olih Bendesa lan Prajuru Pakraman, kasarengin Klijan Banjar, saha kasaksinin olih Prajuru Dinas pinaka saksi.  
(3) Luwir sang ngalingga Tanganin :  
ha. Kaprathama Prajuru Pakraman :

1. Bendesa Pakraman


  
( KETUT SEPID )

2. Panyarikan

  
( I NYOMAN ALUS )



na. Kaping kalih Prajuru Dinas pinaka saka :



Mengetahui dan telah dicatatkan



Pada tanggal : 18 April 2002  
Nomor : 8 Tahun 2002

BUPATI GIANYAR

TJOKORDA GDE BUDI SURYAWAN, SH.